

les pauvres Floridiens furent abandonnez à la cruauté & Domination Espagnolle, qui les a depuis possédez & dominez Tyranniquement, nous en ayant rauy la conqueste volontaire, & la traite qui nous eust esté vn port & retraite assurée, pour accoster auantageusement & iouir des plantureuses Isles du Peru & de la Mezicque, s'emparant comme il eust esté aisé du bon port de la Hauane, en l'Isle de Cuba, si proche de la Floride.

La Virginie se trouue située sous les 36. & 37. degrez proche de la Floride de la manière, fertillité & beauté de laquelle elle participe, estant meslée & entrecouppée de bois de Sassafras & de plusieurs autres commoditez. Les Anglois raudans les Costes de Canada, en l'an 1594. vers le quartier de la Floride y prindrent terre en vn lieu qu'ils appellerent premierement Mocosa, puis le nommerent Virginie où Virginies, a cause de la Reyne Elyzabet qui n'auoit iamais marié, laquelle commença d'y enuoyer vne Colonie d'Anglois hommes & femmes qui y ont multiplié, puis par la faueur & les Priuileges à eux accordez par Iacques Roy d'Agleterre son successeur, pour y habiter & s'augmenter, leur ayant donné pouuoir, terres & possessions aux enuirs, Ils y ont grandement trauersé nostre habitude par la leur, & se sont infiniment estendus hors de leurs bornes, & eniambé sur les nostres: car encor que la Virginie fust eslongnée de plus de cinq cents lieues du Cap Breton, premierement descouuert, nommé, conquis & possédé par les François, desy plus de 150. ans: Neantmoins ils ont tasché à toutes occasions, non seulement d'entreprendre iusques-là, mais de passer plus outre.

Les Anglois de Virginie & les Ambarquemens d'Angleterre se fauorisans pour cet effect de toutes sortes de commoditez, de rafraichissemens & d'aduiz les vns les autres, s'e-